

փոքր իշխանս Լատինաց, յորս հարկ էր լինել Բրնձին Անտիոքայ, հաւանօրէն եւ նորընծայ թագաւորին Կիպրոսի, դեսպանաց այլ եւ այլ պետութեանց արեւմտից եւ գործակալաց Հասարակապետութեանցն Իտալիոյ:

Ե. Հանդէս Ջրօրհնեաց յամի 1212.

Ոչ է մոռանալ եւ զհրճուական հանդէսս զոր համաշխարհի ժողովրդեանն կարգեաց 'ի վայելս, որպէս 'ի դէպ է ասել՝ բազմօրեայ աւուրքք. այն զի 'ի մեծի տօնի Յայտնութեան Տեառն հանդիպեցաւ եւ կարգ օծմանն 'ի թագաւոր, յորում սովորութիւն էր ազգիս 'ի վաղ ժամանակաց, աշխարհախումբ տօն ցնծութեան կատարել, եւս եւ եկեղեցական օրինօք, Ջրօրհնեաց արարողութեամբ, ընդ նմին քաղաքական հանդիսիւ եւ պէսպէս զբօսանօք. որոց առաջին մարթ է գրել զգօրահանդէսն, զոր ոչ խափանէր, այլ մանաւանդ յորդորէր եղանակ երկրին Լեւոնի, մանաւանդ զի 'ի Տարսուն 'ի ջերոտ ծովակողմն՝ կատարեցաւ հանդէսս այս մեծ, ուր գրեաթէ չերեւի ձմեռն, եւ բարեխառնագոյն յայնժամ են օղբ քան 'ի գարնայնի եւ ամարանի: Չիք երկբայել զի շքեղագոյն յոյժ եղեն ամենայն հանդէսք յայսմ ամի տօնի Ջրօրհնեաց եւ պսակման Լեւոնի, քան որ յգկնիսն, զորոց զմիոյ ընծայէ մեզ նկարագիր՝ եկ ոմն օտարական 'ի խորոց Գերմանիոյ, յերկրէ Հաննովրի, Վիլլեպրանտ ազնուական Օլտէմպուրկցի⁹⁶, յամի 1212 գտեալ յարքունիս Լեւոնի 'ի Սիս եւ 'ի հանդիսի անդ. զորոյ արժան համարիմ առ տեղեաւս թարգմանել զբանս. «Յաւուր տօնի Յայտնութեան Տեառն, զոր Հայք Մկրտութեան կոչեն, ժամանեցաք 'ի Սիս, յոր հրաւիրեալն էր զմեզ թագաւորին՝ կատարել զհանդէս տօնի իւրոյ:... Ի ծագել առաւօտուն՝ փութային ամենեքեան երթալ 'ի գետ անդր, որ առ երի քաղաքաւանին, ուր իջանէր եւ Տէրն արքայ այսու կարգաւ. ինքն հեծեալ էր յերիվար բարձրապարանոց. յաջմէ եւ յահեկէ նորա երթային կարգապետ (մայստո) տանն Ալամանաց, եւ բերդապան Հիւրատանն Սելեւկիոյ, դասուք հազար արանց կրօնաւորաց ընկերաց իւրեանց. զհետ նոցա՝ Պարոնն Ռուբէն՝ կրսէրն թագաւոր, (զոր՝ որպէս կանխաւ ասացի, Ոթոն կայսր Հռովմայեցոց՝ ըստ

⁹⁶ Յիշեալս այս այր եւ այլուր եւ 'ի Տեղագրութեանս, Willebrand, էր 'ի զարմէ Կոմսից Օլտէմպուրկի Գերմանիոյ, ոչ միայն ուխտից աղագաւ եկեալ յԱսորիս, այլ թուի եւ հրէշտակութեամբ՝ առ Լեւոն. զի ընդ իւր էր եւ դեսպան դքսին Աւստրիոյ. նուիրեալ եկեղեցւոյ՝ հետ զհետէ եղեւ կանոնիկոս Հիլտեսհայմի, եպիսկոպոս Բատերպոռնի, արքեպիսկոպոս Ուդրէխի: